

Na osnovu člana 15. Odluke o uslovima i načinu dodjele „Šestoaprilske nagrade Grada Sarajeva“ („Službene novine Kantona Sarajevo“, broj 41/22 i) i Odluke o izmjenama Odluke o uslovima i načinu dodjele „Šestoaprilske nagrade Grada Sarajeva“, broj 01-GV-02-1818/22 od 30.11.2022. godine, Odbor za dodjelu „Šestoaprilske nagrade Grada Sarajeva“, na Prvoj sjednici održanoj dana 09.12.2022. godine, donio je

P O S L O V N I K
*o radu Odbora za dodjelu „Šestoaprilske nagrade Grada Sarajeva“
u 2023. godini
(radni materijal)*

I OPĆE ODREDBE

Član 1. **(Predmet)**

Ovim Poslovnikom se uređuje način rada Odbora za dodjelu „Šestoaprilske nagrade Grada Sarajeva“ u 2023. godini (u daljnjem tekstu: Odbor), način razmatranja kandidatura i glasanje, tajnost rada Odbora, i druga pitanja, a u skladu sa Odlukom o uslovima i načinu dodjele „Šestoaprilske nagrade Grada Sarajeva“ (u daljem tekstu: Odluka).

Član 2. **(Prava i obaveze članova Odbora)**

Svaki član Odbora ima pravo i obavezu da prisustvuje sjednicama Odbora i da ravnopravno učestvuje u njegovom radu.

II DJELOKRUG POSLOVA KOJE VRŠI ODBOR

Član 3. **(Djelokrug Odbora)**

(1) Odbor vrši sljedeće poslove:

- a. bira Predsjedavajućeg i zamjenika Predsjedavajućeg Odbora;
- b. usvaja Poslovnik o radu Odbora;
- c. usvaja i upućuje Javni poziv o uslovima i načinu predlaganja kandidata za dodjelu „Šestoaprilske nagrade Grada Sarajeva“ u 2023. godini (U daljem tekstu: Javni poziv), putem sredstava javnog informisanja i na službenoj stranici Grada Sarajeva, u trajanju od 45 dana;
- d. predlaže i utvrđuje spisak afirmiranih strukovnih udruženja od značaja kao i sindikata iz oblasti u kojima se Nagrada dodjeljuje (privrede, nauke i obrazovanja, kulture i umjetnosti, sporta, zdravstva i socijalne zaštite, drugim oblastima rada i stvaralaštva, bez obzira na godinu ostvarenja, a koji doprinose ukupnom unaprjeđenju, promociji i razvoju grada Sarajeva, kao glavnog grada Bosne i Hercegovine i Federacije Bosne i Hercegovine);
- e. usvaja dinamiku održavanja sjednica, a u skladu s dinamikom aktivnosti u pripremi sjednica Gradskog vijeća;
- f. utvrđuje dinamiku objave Javnog poziva u sredstvima javnog informisanja;
- g. određuje se o blagovremenosti i potpunosti prijedloga, te usvaja listu prijedloga za kandidate za dodjelu „Šestoaprilske nagrade Grada Sarajeva“ (U daljem tekstu: Nagrade) koji zadovoljavaju uslove propisane Odlukom, odnosno Javnim pozivom, posebno za pojedinačnu Nagradu, posebno za kolektivnu Nagradu; uz određivanje oblasti u kojoj je predložen kandidat dao najveći doprinos ukupnom razvoju, odnosno promociji Grad Sarajeva;
- h. nakon razmatranja i izjašnjavanja o predloženim kandidatima, Odbor utvrđuje prijedloge za po dva prvorangirana kandidata koji se upućuju Gradskom vijeću na konačno odlučivanje, i to posebno za

pojedinačnu, a posebno za kolektivnu Nagradu, ako su bila dva ili više prijedloga, u suprotnom, za jednog kandidata, ako je jedan kandidat dobio podršku većine od ukupnog broja izabраниh članova Odbora, odnosno, ne utvrđuje prijedlog odluke, ako niti jedan predloženi kandidat nije dobio podršku većine članova Odbora;

- i. Odbor podnosi Gradskom vijeću izvještaj o radu Odbora sa utvrđenim prijedlozima odluka o dodjeli nagrade za kandidate iz prethodnog stava ovog člana Poslovnika, u potrebnom roku, utvrđenom dinamikom rada Odbora.

III NAČIN RADA ODBORA

Član 4.

(Sazivanje prve sjednice Odbora)

Prvu sjednicu Odbora saziva predsjedavajući Gradskog vijeća Grada Sarajeva.

- (1) Poziv za prvu sjednicu Odbora upućuje se članovima Odbora najmanje tri dana prije održavanja sjednice.
- (2) Članovima Odbora se, uz poziv, dostavlja prijedlog dnevnog reda i odgovarajući materijali.

Član 5.

(Izbor predsjedavajućeg i zamjenika predsjedavajućeg Odbora)

- (1) Na prvoj sjednici, Odbor bira Predsjedavajućeg i zamjenika Predsjedavajućeg Odbora.
- (2) Predsjedavajući Odbora, odmah, po izboru, preuzima dalje vođenje sjednice Odbora.

Član 6.

(Djelokrug predsjedavajućeg Odbora)

Predsjedavajući Odbora stara se o primjeni ovog Poslovnika, izvršavanju zadataka u rokovima utvrđenim dinamikom pripreme i održavanja redovne i Svečane sjednice Gradskog vijeća Grada Sarajeva, u povodu 6. aprila – Dana Grada Sarajeva, kao i o ostvarivanju prava i obaveza članova Odbora.

Član 7.

(Sjednice Odbora)

- (1) Odbor radi i punovažno odlučuje na sjednici na kojoj prisustvuje većina članova Odbora.
- (2) O pripremanju i organizovanju sjednica Odbora stara se Predsjedavajući Odbora.
- (3) U slučaju odsutnosti Predsjedavajućeg Odbora, zamjenjuje ga zamjenik Predsjedavajućeg Odbora.

Član 8.

(Sazivanje sjednica Odbora)

- (1) Sjednice Odbora zakazuje Predsjedavajući Odbora.
- (2) Poziv za sjednicu Odbora upućuje se članovima Odbora pet dana prije održavanja sjednice, a izuzetno, Predsjedavajući može sazvati sjednicu Odbora u roku kraćem od pet dana te dnevni red za ovu sjednicu može predložiti i na samoj sjednici.
- (3) Članovima Odbora se, uz poziv, dostavlja i prijedlog dnevnog reda, odgovarajući materijal i zapisnik sa prethodne sjednice.

Član 9.

(Dnevni red sjednice)

- (1) Predsjedavajući Odbora predlaže dnevni red sjednice.
- (2) Članovi Odbora mogu, na sjednici, predložiti izmjene ili dopune predloženog dnevnog reda, s tim što su dužni da obrazlože svoj prijedlog, o čemu odlučuje Odbor.
- (3) Dnevni red sjednice usvaja Odbor.

Član 10.
(Zapisnik o radu sjednice Odbora)

- (1) O toku sjednice vodi se zapisnik.
- (2) Zapisnik sadrži osnovne podatke o prisustvu na sjednici, učesnike u diskusiji, zaključke o pitanjima koja su bila utvrđena dnevnim redom, odnosno zaključke o određenim proceduralnim pitanjima u skladu s ovim Poslovnikom i rezultate glasanja.
- (3) Zapisnik potpisuje Predsjedavajući Odbora.

Član 11.
(Glasanje)

- (1) Odluke Odbora se donose većinom glasova ukupnog broja članova Odbora.
- (2) Odbor odlučuje o svim proceduralnim pitanjima i usvaja zapisnike o radu sa prethodnih sjednica, javnim glasanjem na sjednici Odbora.

IV POSTUPAK ZA UTVRĐIVANJE KANDIDATA ZA DOBITNIKE „ŠESTOAPRILSKE NAGRADE GRADA SARAJEVA“ U 2023. GODINI SA POSTUPKOM GLASANJA

Član 12.
(Prva sjednica Odbora)

Odbor, na **prvoj sjednici**, bira Predsjedavajućeg i zamjenika Predsjedavajućeg Odbora, usvaja Poslovnik o radu Odbora, donosi dinamiku rada Odbora, usvaja tekst Javnog poziva i utvrđuje štampane i elektronske medije javnog informisanja u kojima će se objaviti Javni poziv sa dinamikom objave, kao i spisak afirmisanih udruženja od značaja te sindikata kojima se upućuje Javni poziv za predlaganje kandidata za dodjelu Nagrade, u skladu sa Odlukom.

Član 14.
(Druga sjednica Odbora)

Stručna služba za poslove Gradskog vijeća, na **drugoj sjednici**, članovima Odbora uručuje materijal sa pristiglim prijedlozima za kandidate za dodjelu Nagrade, sa naznakom oblasti za doprinos predloženog kandidata kako je to istaknuto u pristiglim prijedlozima.

Član 15.
(Treća sjednica Odbora)

- (1) Na **trećoj sjednici**, Odbor se određuje o tome jesu li dostavljeni prijedlozi za kandidate za dodjelu Nagrade, blagovremeni i potpuni u skladu s Odlukom, odnosno Javnim pozivom, te utvrđuje liste predloženih kandidata za koje su podneseni blagovremeni i potpuni prijedlozi, posebno za pojedinačnu, posebno za kolektivnu nagradu, raspoređenih po oblastima u kojima su kandidati dali najveći doprinos ukupnom razvoju, odnosno promociji Grada Sarajeva.
- (2) Ukoliko Odbor ocijeni da je predloženi kandidat dao veći doprinos ukupnom razvoju, odnosno promociji Sarajeva, u drugoj oblasti u odnosu na onu za koju je predložen, Odbor može tako i odlučiti i pridružiti imenu kandidata drugu oblast.
- (3) Nakon donošenja konačnog rasporeda prijedloga za kandidate po oblastima: privreda, nauka i obrazovanje, kultura i umjetnost, sport, zdravstvo i socijalna zaštita i druge oblasti rada i stvaralaštva, Odbor, većinom glasova, za svakog predloženog kandidata pojedinačno, odlučuje je li prijedlog podnesen u propisanom roku i je li potpun, a prema kriterijima iz Odluke, odnosno iz Javnog poziva.
- (4) Na osnovu dobivenih rezultata, pripremaju se glasački listići za drugi krug glasanja i to posebno za pojedinačnu, a posebno za kolektivnu nagradu.
- (5) Članovi Odbora preuzimaju ovjerene glasačke listiće za drugi krug glasanja.

- (6) Članovi Odbora samostalno razmatraju prijedloge te se o predloženim kandidatima, na glasačkim listićima, u prvom koraku drugog kruga glasanja, određuju tako da svoj glas, zaokruživanjem broja ispred predloženog kandidata, daju predloženim kandidatima za koje cijene da je njihov doprinos vrijedan razmatranja za dodjelu Nagrade. Prijedlozi za kandidate koji poslije takvog izjašnjavanja, dobiju većinu glasova članova Odbora, dalje se razmatraju za konačno utvrđivanje kandidata za dodjelu Nagrade.
- (7) Ispunjene glasačke listiće iz stava 6. ovog člana, članovi Odbora uručuju na četvrtoj sjednici Odbora.
- (8) Izuzetno, ukoliko je zaprimljen premali broj predloženih kandidata, po prijedlogu Stručne službe za poslove Gradskog vijeća, provodi se odmah drugi korak drugog kruga glasanja, iz člana 16. ovog Poslovnika, o čemu odlučuje Odbor svojim zaključkom pri prijemu prijedloga za kandidate za dodjelu Nagrade.

Član 16.

(Četvrta sjednica Odbora)

- (1) Na **četvrtoj sjednici** Odbor, na prijedlog Predsjedavajućeg Odbora, formira Komisiju za brojanje glasova (u daljem tekstu Komisija) sastavljenu od tri člana Odbora. Zadatak Komisije je da izvrši brojanje glasova i podnese Odboru izvještaj.
- (2) Komisija za brojanje glasova, preuzima dostavljene glasačke listiće, pregleda ih i evidentira broj dostavljenih potpunih glasačkih listića; evidentira broj važećih, odnosno nevažećih glasačkih listića i evidentira koji su predloženi kandidati dobili većinu glasova ukupnog broja članova Odbora i to posebno za pojedinačnu, a posebno za kolektivnu nagradu, te podnosi izvještaj Odboru.
- (3) Uz izvještaj, Odboru se dostavljaju i glasački listići za sljedeći korak glasanja i to poseban glasački listić za predložene kandidate za dodjelu pojedinačne, a poseban za dodjelu kolektivne nagrade. Na glasačkim listićima su istaknuti predloženi kandidati koji su u prvom koraku drugog kruga glasanja, dobili većinu glasova ukupnog broja članova Odbora.
- (4) Po podnošenju izvještaja Komisije za brojanje glasova, članovi Odbora preuzimaju ovjerene glasačke listiće za drugi korak drugog kruga glasanja.
- (5) Članovi Odbora samostalno razmatraju prijedloge kandidata istaknute na glasačkim listićima iz stava 4. ovog člana, posebno za dodjelu pojedinačne, a posebno za dodjelu kolektivne nagrade, te se o predloženim kandidatima u drugom koraku drugog kruga glasanja, određuju na način da uz ime predloženog kandidata pridruže broj bodova i to tako da najveći broj bodova (najveći broj bodova iznosi pola, odnosno jedan više od pola, ako se radi o neparnom broju, vrijednosti broja predloženih kandidata na glasačkom listiću) daju predloženom kandidatu kojeg preferiraju, dva boda manje sljedećem predloženom kandidatu i zatim, po jedan bod manje svakom sljedećem predloženom kandidatu, a predloženi kandidati čiji doprinos ocijene najmanje vrijednim, u odnosu na doprinos svih predloženih kandidata na glasačkom listiću, ostaju bez bodova.
- (6) Ispunjene glasačke listiće iz stava 4. i 5. ovog člana, članovi Odbora uručuju na petoj sjednici Odbora.

Član 17.

(Peta sjednica)

- (1) Na **petoj sjednici** Odbora, Komisija za brojanje glasova, evidentira broj dostavljenih potpunih glasačkih listića; evidentira broj važećih, odnosno nevažećih glasačkih listića i evidentira ukupan broj bodova koji je dobio svaki od predloženih kandidata te podnosi Odboru izvještaj. Uz izvještaj dostavlja i konačne liste predloženih kandidata poredanih po broju dobivenih bodova članova Odbora i to posebno za pojedinačnu, a posebno za kolektivnu nagradu.
- (2) Ukoliko po dva prvorangirana predložena kandidata dobiju različit broj bodova, utvrđuju se kao kandidati Gradskom vijeću za dodjelu nagrade, osim predloženog kandidata koji je ostao bez bodova.
- (3) Ukoliko dva predložena kandidata na mjestu prvorangiranog, odnosno drugorangiranog kandidata, dobiju jednak broj bodova, Odbor se glasanjem određuje o tome koji od predloženih kandidata će biti prvorangirani, a koji drugorangirani kandidat, odnosno koji će biti drugorangirani, a koji trećerangirani

za dodjelu Nagrade odlukom Gradskog vijeća (na za to pripremljenim glasačkim listićima, tako što će svaki član Odbora zaokružiti broj kraj predloženog kandidata kojeg preferira).

Član 18.
(Šesta sjednica)

Na **šestoj sjednici** Odbora, na osnovu izvještaja Komisije za brojanje glasova, Odbor utvrđuje prijedloge odluka o dodjeli Nagrade za svakog kandidata pojedinačno (uz naznaku da se radi o pojedinačnoj, odnosno kolektivnoj Nagradi), te zajedno sa Izvještajem o radu Odbora, dostavlja ih Gradskom vijeću na razmatranje i konačno odlučivanje.

V TAJNOST RADA ODBORA

Član 19.
(Tajnost rada Odbora)

- (1) Članovi Odbora se obavezuju na tajnost svih podataka o kandidatima.
- (2) Članovi Odbora se obavezuju da neće davati izjave u medije ili preko društvenih mreža, sve do zvanično upućenog prijedloga odluka Gradskom vijeću Grada Sarajeva.
- (3) Član koji prekrši obaveze iz prethodnih stavova ovog člana suspenduje se od daljnjeg rada u Odboru većinom glasova članova Odbora.
- (4) Obrazloženi prijedlog za suspenziju može uputiti bilo koji član Odbora, gradski vijećnik i gradonačelnik.

Član 20.
(Komunikacije s javnošću)

Nakon utvrđenih prijedloga kandidata, Predsjedavajući Odbora može izvijestiti javnost o činjenicama, u skladu s posebnim zaključkom Odbora ili Odbor može zadužiti Stručnu službu za poslove Gradskog vijeća da, u ime Odbora, uputi saopćenje za medije.

Član 21.
(Mandat članova Odbora)

Mandat članovima Odbora prestaje usvajanjem Izvještaja o radu Odbora od strane Gradskog vijeća Grada Sarajeva.

VI ZAVRŠNE ODREDBE

Član 22.
(Stručni i administrativni poslovi)

Stručne, administrativne i druge poslove za potrebe Odbora vrši Stručna služba za poslove Gradskog vijeća Grada Sarajeva.

Član 23.
(Druga pitanja)

Za način rada Odbora, odnosno pitanja koja nisu uređena ovim Poslovníkom, kao i druga pitanja od značaja za rad Odbora, Odbor donosi poseban zaključak.

Član 24.

(Izmjene i dopune Poslovnika)

Izmjene i dopune Poslovnika vrše se na način i po postupku za njegovo donošenje.

Član 25.

(Stupanje na snagu Poslovnika)

Ovaj Poslovnik stupa na snagu danom donošenja.

PREDSJEDAVAJUĆI ODBORA

Broj: 04-GV-02- -1/22

Sarajevo, . . . 2022. godine